

- 1<sup>r</sup> Gar dick der hächlen / er entpfyndt
- 2<sup>r</sup> Wer stâtes zancket / wie eyn kyndt
- 3<sup>r</sup> Vnd meynt die worheyt machen blyndt



## Zancken vnd zu gericht gon

- 1 Von den narren will ich ouch sagen
- 2 Die jnn eynr yeden sach went tagen
- 3 Vnd nüt mit lieb lont komen ab
- 4 Do man nit vor / eyn zanck vmb hab

5 Do mit die sach sich lang verzych  
 6 Vnd man der gerechtikeyt entfliech  
 7 Lont sie sich bitten / triben / manen  
 8 Echten / verlüten / vnd verbannen /  
 9 Verlossend sich / das sie das recht  
 10 Wol bügen / das es nit blib schlecht  
 11 Als ob es wer eyn wächsyn naß  
 12 Nit denckend / das sie fynd der haß  
 13 Der jnn der schriber pfeffer kundt  
 14 Der vogt / gwalthaber / vnd fürmundt  
 15 Vnd aduocat / muß zů sym disch  
 16 Dar von ouch han eyn schlägle visch  
 17 Die können dann die sach wol breyten  
 18 Vnd jr garn noch dem wiltprät spreysten  
 19 Das vß eym sächle / wurt eyn sach  
 20 Vnd vß eym rünsly / werd eyn bach  
 21 Man muß yetz kostlich redner dingen  
 22 Vnd sy von verren landen bringen  
 23 Das sie die sachen wol verklügen  
 24 Vnd mit geschwätz / eyn richter btriegen  
 25 So muß man dann vil tag an stellen  
 26 Do mit der tagsolt mög vff schwällen  
 27 Vnd werd verritten / vnd verzert  
 28 Me / dann der houbtsach zů gehört  
 29 Mancher verzert jn petterle me  
 30 Dann jm vß synem tag entstee /  
 31 Noch meynt er worheynt also blenden  
 32 So er die sach nit bald loßt enden  
 33 Jch wolt wem wol mitt zancken wår  
 34 Das er am ars hett hächlen schwår